

दिनांक 25.11.2025

समय: 18.45 बजे

- प्रधानमंत्री नरेन्द्र मोदी अयोध्या मांय श्री राम जन्मभूमि मंदिर रा गुम्बद माथे धर्म ध्वजा फहरायी-कह्यो के आ ध्वजा भारत री सभ्यता रा पुनर्जागरण रो प्रतीक हैं
- मुख्यमंत्री भजनलाल शर्मा पाली जिला मांय विकास रा 110 करोड़ रुपया ऊं बत्ता खर्च वाळा कामां री नींव रखी अर पूरा व्ह्या काम जनता ने सूंप्यां
- लोकसभा अध्यक्ष ओम बिरला जयपुर रा एक गैर-सरकारी विश्वविद्यालय रा कार्यक्रम मांय कह्यो-संविधान री समझ ऊं देश रा लोकतंत्र रो मान बधे हैं
- खेलो इंडिया यूनिवर्सिटी गेम्स मांय आज महाराजा गंगासिंह विश्वविद्यालय रा मानव सारदा 40 किलोमीटर इंडीविजुअल टाइम ट्रायल मांय सोना रो तमगो जीत्यों

000

प्रधानमंत्री नरेंद्र मोदी आज उत्तर प्रदेश रा अयोध्या मांय श्रीराम जन्मभूमि मंदिर रा गुम्बद माथे धर्म ध्वजा फहरायीं ई मौके श्री मोदी कह्यो के आ ध्वजा भारत री सभ्यता रा ओजू जागरण री प्रतीक हैं वे कह्यो के आ पवित्र ध्वजा ई बात रो सबूत है के झूठ माथे सांच री जीत व्हे हैं वे ज़ोर दे र कह्यो के लोकतंत्र भारत रा खून मांय है अर केंद्र सरकार हर एक जणा, खासकर समाज रा वंचित तबका रा लोगां ने आगे बधावण सारु काम कर रही हैं श्री मोदी कह्यो के भगवान राम दुभांत नी करे है अर सरकार ई इण ई भावना सागे काम कर रही हैं

0000

मुख्यमंत्री भजनलाल शर्मा आज पाली जिला रा चामुंडेरी मांय राजकीय बालिका उच्च माध्यमिक विद्यालय जनता ने सूंप्यों ई मौके वे कह्यो के वां रा राज मांय समान भाव ऊं प्रदेश री 8 करोड़ जनता सारु काम कर्यो जा रह्यो हैं श्री शर्मा पेपर लीक माथे आंकस लगावण अर मोट्यारां ने नौकरियां देवण री बात ओजू कहीं मुख्यमंत्री राजस्थान रे सूरज री रोशनी ऊं बिजली बणावण रा हलका मांय देश मांय अव्वल रेहवण ने माथो ऊंचो करण वाळी बात बतायीं श्री शर्मा सुमेरपुर रा नेतारा गांव मांय मीरा माधव सरकार प्राण प्रतिष्ठा समारोह अर आशापुरा गौशाला रा कार्यक्रम मांय ई शामिल व्ह्यां ई मौके वे कह्यो के गायों री सेवा सारु वां री सरकार सगळा जरूरी जतन कर रही है अर जवाई बांध ऊं पाली, जालौर अर सिराही ने पाणी मिल रह्यो हैं

0000

उपमुख्यमंत्री दीया कुमारी आज जयपुर मांय प्रोजेक्ट मॉनिटरिंग इंफॉर्मेशन सिस्टम एप्लिकेशन जनता ने सूंप्यों वे शासन सचिवालय मांय पीडब्ल्यूडी रा काम रो जायजो लेवण सारु राख्यी ज्यी मीटिंग मांय बोल रही हीं दीया कुमारी कह्यो के प्रदेश मांय सैर-सपाटा रा विकास मांय पीडब्ल्यूडी रो खास काम हैं वे सैर-सपाटा री ठोडां सैलानियां री आसान पहुँच सारु चोखी सड़कां बणावण माथे खास ध्यान देवण बाबत कह्यो

0000

केंद्रीय वाणिज्य अर उद्योग मंत्री पीयूष गोयल कह्यो है के कागजी कार्रवाई कम करण रा मकसद ऊं 29 श्रम कानूनां ने आसान बणा र चार श्रम संहिता बणायी ज्यी हैं वे नई दिल्ली मांय राष्ट्रीय व्यापार नेतावां रा सम्मेलन मांय बोल रह्या हां श्री गोयल कह्यो के नुवी श्रम संहितावां बेहतर श्रम प्रथा ने बधावो देवण वाळी अर मजूरां सारु कम ती कम मजदूरी री गारंटी देवे हैं

0000

लोकसभा अध्यक्ष ओम बिरला नौजवान पीढी ऊं संविधान रा खास विचार जाणबा अर भारत ने विकसित देश बणावण रा काम मांय भागीदारी करण सारु कह्यो हैं वे आज जयपुर मांय एक गैर सरकारी विश्वविद्यालय मांय संविधान दिवस रा बारा मांय राख्यी ज्यी कार्यक्रम मांय बोल रह्या हां श्री बिड़ला कह्यो के संविधान री जाणकारी अर समझ ऊं देश रा प्रजातंत्र अर वां रा नियमां सारु मान बधे हैं लोकसभा अध्यक्ष कह्यो के भारत मांय सगळां री बात सुण र समझबा री रीत रही हैं श्री बिड़ला नौजवानां ऊं संविधान बणावण री बगत व्ही न्यारी-न्यारी बहस री जाणकारी लेवण बाबत कह्यो लोकसभा अध्यक्ष कह्यो के केई विकसित देशां रा विकास मांय भारत रा नौजवानां रो मोटो काम हैं

0000

विधानसभा अध्यक्ष वासुदेव देवनानी अंता विधानसभा उपचुनाव मांय चुण र आया विधायक प्रमोद जैन भाया ने आज विधानसभा मांय शपथ दिरायीं जैन हिंदी मांय शपथ लीनीं

0000

प्रदेश मांय चाल रह्या खेलो इंडिया यूनिवर्सिटी गेम्स मांय आज राजस्थान सारू बीकानेर रा महाराजा गंगासिंह विश्वविद्यालय रा मानव सारदा पुरुषां री 40 किलोमीटर इंडीविजुअल टाइम ट्रायल मांय सोना रो तमगो जीत्यों आं खेलां मांय सड़क माथे साइकिल चलावण री होड़ मांय इण ई विश्वविद्यालय री पूजा बिश्नोई चांदी रो तमगो जीत्यों ई होड़ मांय ओ मेजबान राजस्थान रो पहलो तमगो हैं पूजा 30 किलोमीटर टाइम ट्रायल मांय 46 मिनट 52 सेकंड रो बगत लीनों होड़ मांय सोना रो तमगो गुरुनानक देव युनिवर्सिटी री मीनाक्षी रोहिल्ला जीत्यों जयपुर मांय व्ही निशानेबाजी री 10 मीटर एयर राइफल होड़ मांय लवली प्रोफेशन यूनिवर्सिटी सोना रो तमगो जीत्यों बीकानेर मांय महिलावां री वजन ऊंचावण री होड़ रा 48 किलोग्राम भार वर्ग मांय शिवाजी युनिवर्सिटी री काजोल सरगर सोना रो तमगो जीत्यों

फुटबॉल मांय तमिलनाडू री अन्नामलाई युनिवर्सिटी गोवा युनिवर्सिटी ने अर हॉकी मांय एम.डी. युनिवर्सिटी हरियाणा लवली प्रोफेशनल युनिवर्सिटी ने शिकस्त दीनीं

0000

राज्य मांय वोटर लिस्टां रा विशेष गहन पुनरीक्षण रो काम चाल रह्यो हैं डूंगरपुर मांय जिला कलेक्टर अंकित कुमार सिंह 100 फीसदी काम पूरो करण वाळा 17 बूथ लेवल अहलकारां रो मान कीनों

वोटर लिस्टां रा खास गहन पुनरीक्षण अभियान रा तैत सीकर जिला मांय ई 127 बीएलओ 100 फीसदी काम पूरो कर लीनो हैं जिला निर्वाचन अधिकारी मुकुल शर्मा बतायो के एसआईआर रो खास मकसद साफगोई सागे वोटर लिस्टां तैयार करणो हैं भरतपुर जिला मांय 11 लाख 33 हजार 881 मतदातावां मांय ऊं 9 लाख 23 हजार 993 मतदातावां रा प्रपत्र डिजिटल बना दिया ज्या हैं

0000

बालोतरा जिला रा नामी तीर्थ रानी रूपा दे मंदिर मांय राजस्थान राज्य विधिक सेवा प्राधिकरण री मदद ऊं 'सृजन से सुरक्षा' कार्यक्रम राख्यी ज्यों इण मांय नुवी जन्मी टाबरियां रे नाम परां पौधा रोपी ज्या अर वां रा मायतां ने आं री सार-संभाळ री शपथ दिरायी ज्यों विधिक सेवा प्राधिकरण रा सचिव सिद्धार्थदीप ई मौके मौजूद लोगां ने टाबरियां री भणार्ई- लिखाई अर दूजा कानूनी हक रा बारा मांय जाणकारी दीनीं

0000

गोवा मांय चाल रह्या 56वां भारतीय अंतर्राष्ट्रीय फिल्म महोत्सव-इपफी 2025 मांय राजस्थानी फीचर फिल्म 'व्हिस्पर्स ऑफ द माउंटेंस' रो आज खास दरसाव करी ज्यों फिल्म देखण वाळा इण ने चोखी बतायीं फिल्म रा डायरेक्टर जिगर नागदा अर निर्माता जितेंद्र मिश्रा बतायो के आ फिल्म प्रदेश रा अरावली हलका रा बारा मांय बणायी ज्यी हैं इण मांय विनाश रा निशाण री भरपाई सारू पौधा लगावणो बतायी ज्यो हैं

000

युवा कार्यक्रम अर खेल मंत्रालय रा 'मेरा युवा भारत' री ओर ऊं जोधपुर मांय आज कलेक्ट्रेट ऊं सर्किट हाउस ताई यूनिटी मार्च निकाळी ज्यों इण ने राज्यसभा सदस्य राजेन्द्र गहलोत रवाना कीनीं ई मौके नौजवानां ने खुद रे पाण ऊबो भारत बणावण अर नशामुक्ति री शपथ दिरायी ज्यों श्रीगंगानगर मांय ई गृहराज्य मंत्री जवाहर सिंह बेढ़म कुण्डा मिन्दर ऊं रैली ने हरी झण्डी बता र रवाना कीनीं

000

केंद्रीय ग्रामीण विकास मंत्री शिवराज सिंह चौहान आज नई दिल्ली मांय लैंगिक समानता और महिला सशक्तिकरण पर नई चेतना पहलदू बदलाव राष्ट्रीय अभियान रा चौथा दौर री सरूआत कीनीं ई मौके वे कह्यो के बराबरी कोई नारो नी है बल्कि देश री संस्कृति री आत्मा हैं कार्यक्रम मांय महिला अर बाल विकास मंत्री अन्नपूर्णा देवी कह्यो के मौजूदा दौर मांय महिलावां न केवल देश रा विकास मांय योगदान दे रही है बल्कि विकसित भारत री प्रेरणा शक्ति ई हैं महिलावां रे खिलाफ हिंसा उन्मूलन रा अंतर्राष्ट्रीय दिवस रे मौके आज प्रदेश मांय ई न्यारी-न्यारी ठोड़ां जाग जगावण रा कार्यक्रम राख्यी ज्यों हनुमानगढ़ रा राजकीय नेहरू मेमोरियल कॉलेज मांय राष्ट्रीय सेवा योजना री ओर ऊं राख्यी ज्या कार्यक्रम मांय बोलण वाळा डायजा अर घरेलू मारपीट सरीखा मुद्दां माथे खुल र बात केहवण माथे जोर दीनों ई सागे ई महिलावां री हिफाजत, मान अर बराबरी सारू टाबरियां ने वां रा हक री जाणकारी देवण री अपील ई करीजीं

0000